

Heng-khám thiàⁿ (胸坎痛)

張復聚

頭痛、嘴齒痛、腹tó痛、kha手酸痛、胸坎痛，toh一種你上驚？相信大部分ê人lóng會講「胸坎痛」，特別是tī tò-pêng ê時，lóng會liáh-chún是心臟teh痛！

事實kám án-ni? M̄是，絕對m̄是！

Lán先來看胸坎內有siáⁿ-mih構造，ùi頭前面ê胸坎看thàng tùi後壁去，代先是皮膚、奶á，koh入去是排á骨kap肉，koh內面是肺膜、肺kap心臟；若koh再深入，看--著ê構造hām tú-chiah講--ê相kāng，增差順序tò-péng niá。

頂面所講--ê，tāk部分lóng有可能會痛。

先講皮膚，皮蛇(herpes zoster)beh khí-sì ê時，會感覺麻麻、悶痛，過兩三工了，麻痛ê部位會起水泡，kài成水珠(chicken pox)（其實皮蛇kap水珠lóng是kāng一款病毒引起--ê，號做Varicella-zoster virus），這個時chūn，麻痛變做神經痛，親像一條皮帶順排á骨ê勢面teh痛，會tiuh，mā會chhák，lóng總ài兩三禮拜chiah會好--去。

Koh來就是兩粒奶á，發炎也好，生pháiⁿ物也好（奶á生pháiⁿ物m̄是cha-bó人chiah會niá），奶á就會痛。

排á骨若傷--著mā會痛；肉『肋間肌』若傷--著iah是發炎，tiāⁿ-tiòh會痛。肉kap排á骨ê痛，tī lán運動、tín動ê時，會koh-khah痛。

續--落去就是肺膜破空，造成「氣胸」(pneumothorax)，這chūn m̄-tāⁿ會痛，koh會氣喘bē起--來，心臟phók-phók-chháiⁿ、面色tng白，若khah嚴重，hōan-sè會死人！肺膜破空ê原因真chē：1.肺病--ê、食薰--ê，本底肺就bái。2.外傷致使胸坎ê排á骨、肉kap肺膜破--去。3.Tī加護病房tàu呼吸器ê人，呼吸器ê壓力若siuⁿ kōan。4.Mā有人無tāi無chì肺膜破--去(spontaneous pneumothorax)，m̄知原因。

肺部本身有病mā會痛，肺管發炎、ka嗽，iah是肺生癌lóng會痛；肺部ê血筋that--著(pulmonary infarction)mā會。Che tiòh-ài靠hip電光、肺部血筋hip相(angiography)，hōan-sèkohài核子醫學、肺管鏡ê檢查chiah會得thang區別。

胃酸過多，溢chhiah酸溢tùi食道起--來，會造成食道炎，感覺心肝窟á會痛，mā會順食道ê路線ùi心肝窟á痛tùi胸坎kap嚙喉起--來。年久月深，食道kap胃ê交接處會變狹，致使lán吞物件吞bē落--去(dysphagia)。

上尾手，lán來講tāk-ê上kài驚ê心臟痛，che有兩種可能：心膜痛kap心臟本身痛。

心膜就是kā心臟包--le ê hit iân膜。心膜發炎ê原因chiok chē，病毒、細菌、kσ、寄生蟲、生瘤（無論良性iah惡性）、尿毒症、嚴重ê欠血、放射線傷害、外傷、藥á過敏、風濕性關節炎ii，lóng總有四十外個原因thang講！心膜痛是真pháiⁿ忍受。痛ê部位tī tò-pêng胸坎心臟hit tah hia，會thàng tùi後壁去，喘氣kap ka嗽ê時會愈痛；坐hō直、頂半身koh小可á敲tùi頭前去ê時，會感覺khah bē痛，用這點kap心臟本身ê痛做區別。

Hō人上驚惶ê心臟痛就是心臟ê血路bē順，che koh會sái分兩種：1.狹心(angina pectoris)。2.心筋that--著(myo-cardial infartion)。

狹心就是心臟ê血筋變siuⁿ狹，當心臟工作khah重需要khah chē血ê時，soah無法tō供給i用，án-ni心臟就痛--起來。換一句講，就是心臟「相對」血路無夠通；若心臟ê血筋that--著，就是「絕對」血路無通，tāi-chì就有影chiok大條--lō！血路若that--le，血流bē過--去，無血thang使用ê組織（就是心臟本身ê肉）會死--去，範圍若siuⁿ大，心臟會破--去，這個人就會一命嗚呼哀--哉，tng去 chhōe 祖公á phah-lā-liâng！無論「相對」iah「絕對」ê血路無通，心臟lóng會痛，這個痛，論真講，m̄是普通ê痛。Lán所知ê痛有抽痛、tiuh痛、chhák痛、眩痛、kún-ká痛、幽幽á痛、悶悶á痛ii，che lóng m̄是心臟痛。心臟痛ê部位是tī tò-pêng ê 奶á khah óa 心肝窟á hia，痛會連帶去 tò-pêng 頷頸、牙槽、肩胛頭、kha-chiah-phiaⁿ kap tò手。痛本身ê特質是「痛m̄-chiâⁿ痛」(vague discomfort)。感覺ná像有物件teh tī胸坎，mā ná像索á絞--le，oh用真明確ê這種感覺來講hō清楚，簡單講，hit款痛你m̄-bat經驗--過ê就是--a la！Tī chia我mā希望讀台文ê人mài有這款經驗！再會！